



*Iesus fut prié & importuné de la femme Chananée, pour la guarison de sa fille possédée du Diable, & elle obtint sa requeste.*

**I**ESVS se transporta és lieux circonuoisins de Tyr & de Sidon, & entra en vne maison, & vouloit qu'aucun ne lesceust, mais il ne pût estre celé, car vne femme Chananée ( qui estoit Sirophoenicienne de nation ) s'écria, disant ; Seigneur, fils de Daud, aye pitié de moy, ma fille est miserablement tourmentée du Diable ; à quoy Iesus ne luy répondit mot ; Lors ses Disciples s'approchans de luy, le prierent, disans ; Donne-luy congé, Seigneur, car elle crie apres nous. Et répondant, il dist ; Le ne suis enuoyé sinon aux brebis de la maison d'Israël, qui sont peries. Alors elle vint, & l'adora, disant ; Seigneur, ayde-moy ; & il dist, Il n'est pas bon de prendre le pain des enfans, & le ietter aux chiens ? mais elle dist, Il est ainsi, Seigneur ; Toutesfois les petits chiens mangent les miettes qui chéent de la table de leurs Maistres. Lors Iesus répondant, luy dist, O femme, ta foy est grande ! ainsi te soit fait comme tu veux ; & dés ce mesme instant sa fille fut guarie. Et quand elle s'en fut retournée en sa maison, elle trouua que le Diable estoit sorty, & sa fille couchée sur le liét.